

元史新編

元史卷九

本紀七

仁宗

仁宗皇帝諱愛育黎拔力八達武宗母弟也至元二十二

年三月丙子生於儒州

是夜太史奏文昌明文運將興

大德九年冬十月

成宗有疾中宮秉政命帝同母元妃出居懷州所過供帳

華侈悉令撤去飭扈從毋擾民民大感悅十一年春正月

成宗崩時武宗爲懷寧王總兵北邊左丞相阿忽台等潛

謀推成后伯岳吾氏稱制且欲立安西王阿難荅議未決

右丞相哈剌合孫知其謀恐內難作急遣使迎帝帝從李

孟言卽日奉母元妃發懷州至衛輝抵漳河值大風雪田

叟有以孟粥進者近侍卻不受帝曰昔漢光武爲寇兵所

逼嘗食豆粥麥飯大丈夫不歷辛苦庸知稼穡艱難卽取

食之賜叟帛行次邯鄲諭守令曰吾慮衛士不法胥吏科斂爲民困命王傅沿途巡察二月辛亥至大都與母元妃入哭盡哀仍出居舊邸朝夕入奠時哈刺合孫稱疾守宮門夜遣人啟曰懷寧王遠不能猝至恐變生不測當先事而發三月丙寅帝率衛士入內陽召阿難荅計事至則執之且責阿忽台等變亂祖宗家法鞫問辭伏及其黨八都馬辛巴顏等皆伏誅諸王闊闊出身忽都進曰今罪人斯得太子寶世祖之孫宜早正天位帝曰王何出此言彼惡人潛結宮壺構亂邦家故誅之以彰國法豈欲覬望神器邪懷寧王吾兄也正位爲宜乃遣使迎武宗於北邊五月乙丑帝與母元妃會武宗於上都甲申武宗卽位尊元妃爲皇太后六月癸巳朔立帝爲皇太子以安西平江吉州

三路爲分地約以次傳己子先是帝在懷州深見吏傲欲  
痛剷除之及建爲太子雅重儒學遣使旁搜經籍裝演成  
帙識以玉刻印章時有進大學衍義者命詹事王約等節  
而譯之帝曰治天下此一書足矣命與圖象孝經列女傳  
竝刊行以賜臣下至大二年立尙書省詔太子兼尙書令  
詹事院啟金州獻瑟瑟洞請遣使采之帝曰所寶惟賢瑟  
瑟何用焉若此者後勿復聞通攷作皇慶元年事有近侍言賈人售  
美珠者帝曰吾服御不喜飾珠璣以生民膏血不可輕耗  
也汝等當以恭儉愛人相規詎可以奢靡蠹財相導言者  
慚而退淮東宣慰使撒都獻玉觀音七寶帽頂及寶帶卻  
之戒諭如初四年春正月庚辰武宗崩帝入臨壬午卽罷  
尙書省以丞相脫虎脫樂寶平章三寶努右丞保八參政

王巖等變亂舊章流毒百姓命右丞相塔思不花知樞密院事鐵木爾不花等參鞫竝棄市其黨孛羅鐵木爾闊里吉思烏馬爾忙哥帖木爾等杖流海南戊子罷城中都以司徒蕭珍督城工害民奪其符印還中都所占民田召世祖朝諸老臣平章程鵬飛董士選少傅李謙少保張閻史通攷今從右丞陳天祥尙文劉正左丞郝天挺中丞董士珍太子賓客蕭剌參政劉敏中王思廉韓從益侍御趙君信廉訪使程鉅夫乘傳詣闕同議庶政乙未禁百官役軍人造作及守護私第丁酉召鐵木迭爾爲右丞相完澤李孟竝平章政事敕中書凡傳旨非親奉者勿行戊戌以塔思不花爲御史大夫諭曰凡大臣不法卿等劾奏毋避己亥改行尙書省爲行中書省庚子停各處營繕罷廣武康里

衛萬戶等官辛丑以塔失鐵木爾知樞密院事壬寅禁鷹

房馳逐擾民

帝以穀不熟民困曰朕不飛放且敕諸王昔寶赤皆不聽出

二月定諸職

子孫承蔭試一經一史能通大義者免當倮直不通者發

還習學蒙古色目人願試者聽仍於應得品級量進一階

致仕官有子承蔭者準不次銓注俾得祿養其親乙巳改

延慶司爲都功德司罷運江南所印佛經禁宣政院違制

度僧戊申命和林江浙行省依前設左丞相餘省惟置平

章二員盡罷遙授職事辛亥禁諸王駙馬權豪擅據山場

聽民樵采左遷康里托托爲江浙左丞相甲子太陰犯填

星命李孟領國子監學諭曰學校人材所自出卿宜數詣

國學課試諸生勉其德業以白雲宗總攝所統江南爲僧

之有髮者不養父母避役損民勒還原籍罷各處僧官凡

僧人訴訟悉歸有司省福建繡匠河南漁課兩提舉司及江南行通政行宣政二院丁卯敕西僧非奉璽書驛券及無西番宣慰司文牒者勿輒至京師戒黃河津吏驗問禁止復改仁虞院爲鷹房總管府庚午定廣西靜江融州軍民官三載無過者民官減一資軍官升一階著爲令三月庚辰召前樞密副使吳元珪左丞烏伯都刺至京師同諸老臣議事丙戌太陰犯太微東垣上相罷五臺行工部庚寅帝卽位於大明殿詔曰惟昔先帝事皇太后撫朕眇躬孝友天至由朕得託順考遺體重以母弟之嫡加有削平內難之功踐阼曾未踰月授以皇太子寶領中書令樞密院事百揆幾務聽朕裁決於今五年先帝奄棄天下勳戚元老咸謂大寶之承既有成命非與前聖寶天而始徵集

宗親議所宜立者比當稽周漢晉唐故事卽正宸極朕以國恤方新誠有未忍是用經時今則上奉皇太后勉進之命下徇諸王勸戴之勤於三月日卽皇帝位凡尙書省誤國之臣先已伏誅同惡之徒亦皆放殛百司庶政悉歸中書從新拯治可大赦天下凡路府州縣名山大川聖帝明王忠臣烈士載在祀典者有司開具事蹟次第加封開國以來効節功臣所封食邑有司立祠致祭諸衙門及近侍人員毋隔越中書奏事諸上書陳言者量加旌擢風聞不許入告內外百司有清慎公勤政績昭著五事備具者聽監御史廉訪使察舉其廢公營私貪污敗檢諸人陳告得實依律斷罪枉法贓滿者應授宣敕概行追奪吏人犯贓終身不敘誣告者抵罪禁獻地土山場窰冶及中寶之



人以絕僥倖商稅課程曩有定制尙書并增爲額又立增  
酬殿年之令苟非朘剝吾民彼將焉取今後恢辦一遵舊  
制於戲凡我有官君子皆古所謂治天職食天祿者宜一  
心力欽乃攸司毋替朕命辛卯禁民間製銷金織金及成  
造金箔丁酉命月赤察爾依前太師加鐵哥太傅曲出太  
保敕至大中百司改升品級悉復至元舊制己亥寧夏地  
震帝諭省臣曰卿等哀集中統至元以來條章擇曉法律  
老臣斟酌重輕折衷歸一頒行天下俾有司有所遵守則  
抵罪者庶無冤抑又諭大府監曰財用足則可以養萬民  
給軍旅自今一繒之微不言於朕毋輒與人以烏伯都刺  
爲右丞李士英爲左丞察罕參知政事牀兀爾脫火赤鐵  
木爾不花耶速耶先鐵木爾月魯鐵木爾竝知樞密院事

封鐵木爾不花爲宣寧王賜大都高年帛遣宦者李邦寧  
釋奠於孔子初就位大風起殿上燭盡滅燭臺底鐵鑄拔  
地尺許夏四月壬寅定四宿衛士歲賜鈔二十四萬二百  
五錠汰漢人高麗南人冒入者各還元籍丁未以張閭爲  
江浙平章戒之曰以汝先朝舊人故命汝往民爲邦本無  
民何以爲國汝其上體朕心下愛斯民癸丑定路府州縣  
官俱三年爲滿甲寅太陰犯亢熒惑犯壘壁陳丁巳罷中  
政院辛酉敕國子監師儒之職果才而賢勿限資格雖布  
衣亦用癸亥罷中都畱守司復置隆興路總管府丁卯罷  
至大錢鈔詔曰我世祖皇帝參酌古今立中統至元鈔法  
天下流行公私蒙利五十年於茲矣比者尙書省不究利  
病輒意變更旣期至大銀鈔又鑄大元至大銅錢鈔以倍

數太多輕重失宜錢以鼓鑄弗給新舊恣用曾未再期其  
敝滋甚爰咨廷議允協輿言皆願變通以復舊制其罷資  
國院及各處泉貨監提舉司成造銅器聽民自便尙書省  
已發鈔本及至大銅錢截日封貯民間行使者準赴行用  
庫倒換命中書省振濟甘肅過川軍廢僧道耶里可溫答  
失蠻頭陀諸司罷通政院以所掌站赤歸兵部帝御便殿  
李孟進曰陛下御極物價頓減方知聖人神化之速帝蹙  
然曰卿能盡力贊襄使兆民苟安庶幾天心克享至於秋  
成尙未敢必今朕踐祚曾未踰月寧有物價頓減之理朕  
託卿甚重茲言非所賴也孟愧謝五月壬申以宦者鐵昔  
里爲利用監卿封乳母夫楊德榮雲國公丙子敕修武宗  
寶錄及累朝皇后功臣傳俾百司悉上事蹟庚辰故長信

院爲寺置祥和署掌伶人癸未太陰犯氏戊子羅鬼蠻來獻方物六月癸卯敕宣政院凡西番軍務必移文樞密院同議乙巳命侍臣咨訪內外才堪佐國者悉以名聞丙午授內侍楊光祖譚振宗關居仁竝宏文館學士定翰林國史院官承旨五員學士侍讀侍講直學士各二員丁未太陰犯太微東垣上相庚戌犯氏大同路民家產犢類麒麟車載以獻左右皆以爲瑞帝曰五穀豐熟百姓安業乃爲瑞也卻之敕諸司白事令殿中侍御史侍側丙寅拘收泉府司元給諸商符命己巳衛王阿木哥入見帝諭省臣曰朕與阿木哥同父而異母朕不撫育彼將誰賴其賜鈔二萬錠他勿援例帝覽貞觀政要諭侍臣曰此書有益於國家其翻譯刊行俾蒙古人誦習之秋七月辛未朔甘州地

震癸巳太陰掩畢丁酉犯鬼距星己亥置經正監掌蒙古  
軍牧地帝諭省臣曰朕前戒近侍毋輒以文記傳旨中書  
今敢有犯者不待奏聞直執付法曹究治詔御史臺選老  
成更事者爲監察御史閏月辛丑命祭酒劉賡詣曲阜以  
太牢祀孔子甲辰立隆鎮衛於居庸關己酉吐蕃寇禮店  
文州己未增國子生額爲三百人并增陪堂生二十人通  
一經者以次補伴讀定軍官年七十致仕子弟年二十以  
上聽承襲有託疾引年令幼弱子弟襲職者除名不敘丙  
寅太陰犯軒轅黑水白水等蠻十二萬戶來降復立通政  
院於上都領蒙古諸驛禁醫人非選試者毋輒行醫藥九  
月己亥朔禁民彈射飛鳥殺馬牛羊當乳者庚戌命樞密  
院大閱各省軍馬壬子改元詔曰朕賴天地祖宗之靈纂

承聖緒永惟治古之隆羣生咸遂國以乂寧朕夙興夜寐不敢怠遑任賢使能興滯補闕庶其臻茲斂時五福用敷錫厥庶民朕之志也踰年改元厥有常典其以至大五年爲皇慶元年故茲詔示癸丑月食乙卯太陰犯畢遣都水監往杭州取所造龍船省臣諫止之冬十月戊辰朔繪武宗御容奉安大崇恩福元寺月四上祭辛卯罷諸王斷事官置羣牧監掌興聖宮畜牧尙牧所掌太官羊立汴梁平民田賦提舉司掌大承華普慶寺貲產丙申太白犯壘壁陳十一月戊戌立乖西府隸播州以土官阿馬知府事辛亥以諸王結黨誣八不沙爲不軌詔竄卜里身敦於河南因忽乃於揚州納里於湖廣太那於江西班出兀那於雲南甲寅太陰犯輿鬼己未以合散

綱目作阿散

平章政事張珪

爲樞密副使十二月癸酉封宣政會福院使暗普爲秦國公庚辰太白經天甲申太陰犯太微西垣上將詔今歲不登春蒐勿令民供億遣官監視焚至大鈔乙未中書省言祖宗立選法憑黜陟以示激勸今官未及攷或無故更代或躡等進階僭授國公丞相等職諸司已裁而權置者有之今春以來內降旨除官者千餘人其中欺僞豈能悉知壞亂選法莫此爲甚帝曰自今凡內降旨一切勿行是歲增京師米四十所日平糶糧八百石浙西水免漕糧四之一令江西湖廣補運京師

皇慶元年壬子春正月庚戌封駙馬丑漢爲安遠王出總北軍癸丑太陰犯太微東垣上相改封濟王多列納爲吳王壬戌進翰林國史院秩從一品帝曰翰林集賢儒臣朕

白選用省臣毋得擬奏人言御史臺任重朕謂國史院尤重御史臺是一時公論國史院實萬世公論當選中外方正博洽之士居之二月丁卯朔徙大都路學周宣王石鼓於國子監辛未改安西爲奉元路吉州爲吉安路和林爲和寧路隆興爲興和路以和林行省爲嶺北行省壬午太陰犯亢三月丁酉朔熒惑犯東井罷諸王大臣私第營繕己亥制以生日爲天壽節壬寅太陰犯東井丁未起塔失海牙爲御史大夫置內正司及五臺寺濟民局庚申汰控鶴軍還本籍甲子封諸王塔思不花爲恩平王夏四月丙子太白晝見壬午熒惑犯輿鬼癸未犯積尸氣封知樞密院木剌忽爲廣平王敕僧人田除世祖所賜者餘悉輸租庚寅太白經天大崇恩福元寺成置隆禧院五月丙申朔



以合散爲左丞相張閻察罕竝平章政事壬寅禁諸王農

時出獵丁未建涼殿於縉山縣行宮六月乙丑朔日食丁

卯天雨毛己巳太陰犯天關丁亥詔罷封贈之典

時禮部集議封

贈等第以非世祖所行故罷之秋七月丙午升大司農司秩從一品帝曰

農桑衣食之本汝等舉諳知農事者用之戊午太陰犯東

井九月丁卯以阿卜許師敬同參知政事戊辰太白犯軒

轅辛未太陰犯填星壬午辰星犯右執法置少府監隸大

都畱守司乙酉太白犯右執法敕左右勿僥倖乞加官九

月丁巳太陰犯亢冬十月雲南右丞算只爾威有罪國師

請釋之帝曰僧人宜誦佛書官事豈當與邪斥弗聽敕回

回合的仍舊祈福其訴訟歸有司丁亥太陰犯平道戊子

犯亢順宗成宗武宗實錄成十一月己亥太陰犯壘壁陳

丙辰封駙馬脫木爾爲岐王雲南不農鑿渠長岑福來朝十二月癸亥平章李孟致仕以張珪代之甲子熒惑填星辰星聚於斗甲申鷹房總管請往河南湖廣括取珍禽帝以擾民不許戊子太陰犯熒惑遣官祈雪己丑宗王女班丹乘傳取江南田租命拘還驛券是月諸王春丹叛二年癸丑春正月甲午命圖忽魯爲右丞相伯忽爲御史大夫封乞台普濟爲安吉王戊申太陰犯三公己未置遼陽甘肅四川雲南儒學提舉司二月壬戌改典內院爲中政院丁丑日赤如赭免徵益都饑民所貸官糧二十萬石以各寺修佛事日用羊萬頭敕遵制易以蔬食辛巳詔錢糧造作訴訟等事悉歸所司以清中書之務丁亥回回以寶玉鬻於官帝曰朕思此物何足爲寶惟善人爲寶善人

用則百姓安誠國家所宜寶也三月庚子熒惑犯壘壁陳  
丙午立皇后弘吉刺氏丁未有星孛於東井自去秋至今  
不雨大都隕霜雨沙丞相圖忽魯以災變引咎帝曰事豈  
關汝其勿復言丙辰帝以亢旱遣官分祀諸神仍於宮中  
焚香默禱甘雨大注夏四月壬午置中瑞司甲申詔選賢  
士修國史乙酉御史臺言富人黃緣特旨濫授官爵徼政  
宣徽用人多罪廢之流內侍託爲貧乏互奏恩賞西僧作  
佛事累釋重囚外任官身犯刑章輒營內旨免罪諸王駙  
馬寺觀土田每歲徵租民間擾害尤甚帝命悉革其敝五  
月辛丑以烏伯都刺平章政事八刺脫因爲右丞阿卜爲  
左丞圖魯花鐵木爾參知政事六月己未朔京師地震丙  
寅復震命許思敬綱領國子學以監察御史檢察監學官

攷其殿取己卯定邊方遷調官優加一等復起李孟爲翰林學士承旨甲申建崇文閣於國子監以宋儒周敦頤程顥程頤張載邵雍司馬光朱熹張栻呂祖謙及許衡從祀孔子廟庭河決陳亳等州秋七月己丑朔歲星犯東井辛卯太白晝見癸巳以作佛事釋囚徒二十九人甲午置榷茶批驗所并茶由局官乙未太白晝見庚子立長秋寺掌武宗皇后宮政壬寅京師地震丙辰太白晝見丁巳太白經天改淮西三路隸河南省八月戊午朔太白晝見崇明州海溢壬戌歲星犯東井庚午以薛居敬參知政事壬午太陰犯輿鬼九月癸巳以完澤知樞密院事封御史大夫脫歡爲安定王戊申建銀山寺於鎮江勿徙寺旁塋冢京師大旱疫帝問弭災之道翰林學士程鉅夫舉湯禱桑林

事以對帝曰此實朕之責也赤子何罪冬十月己卯封布塔蔑里爲安德王癸未復置蒙陰縣隸莒州十一月甲辰始行科舉詔以皇慶三年八月天下郡縣與其賢者能者充貢有司次年二月會試京師中選者將親策於廷十二月辛酉西域人可里馬丁上所編萬年厯海都篤哇屬戶內附敕所在給衣糧是歲保定真定河間民流亡不止命有司給糧兩月仍免今歲田租

延祐元年甲寅春正月丁亥以劉正平章政事商議中書省事高昉參知政事庚子敕各省平章專意訪求遺逸苟得其人先以名聞而後致之丁未改元延祐赦天下二月戊辰免上都大都差稅二年癸酉熒惑犯東井甲戌以趙世延參知政事綱領國子學壬午圖忽魯罷合散進右丞

相監修國史高昉改集賢學士三月壬辰太陰掩熒惑己亥白暈互天連環貫日暹國遣使入貢癸卯改南劍路曰延平劍浦縣曰南平丙午封阿魯圖爲趙王禁奸民宮其子爲闕宦謀避徭役癸丑晉寧民侯氏昆弟五人竝坐法當死帝嘆曰彼一家不幸而有是事其擇情輕者一人杖之俾養父母毋絕其祀閏月辛酉太陰犯輿鬼罷呪僧月給俸遣人視大都至上都駐蹕之地有侵民田者計畝給直丙寅太陰犯太微東垣上相省滇陽含光二縣入英德州夏四月甲申朔大寧地震太常官請立北郊帝謙讓未遑議遂輟丁酉命鐵木迭爾錄軍國重事監修國史復立回回國子監帝以資治通鑑載前代興亡治亂命集賢院擇其切要者譯寫以進五月戊午辰星犯輿鬼丁卯禁諸

王支屬擅取分地租賦敕嶺北行省瘞陳歿遺骸六月戊子敕宦者勿得畀文階封卜憐吉台爲河南王發軍增墾河南芍陂屯田乙未熒惑犯右執法秋九月己巳命鐵木迭爾爲右丞相合散仍左丞相罷陝西諸道行御史臺冬十月乙未定吏人轉官以從七品爲止在選者降等注授坐贓者黥其面弛下番市舶禁令江浙省給牒以往歸則征稅如制丙申括淮民所佃閑田置沙瓜二州屯儲萬戶府庚戌辰星犯東咸敕軍官應襲者試以武事而後任十一月乙卯置保安軍於麻陽縣以禦獠蠻戊辰以蕭拜住爲中書右丞圖忽魯荅失蠻竝知樞密院事命樞密院教練士卒官吏服闕者先補遣平章張閻經理江浙江西河南民田限四十日以所有田自實於官徹民舍發冢墓虛

張頌畝樞密副使吳元珪入見極言其敝帝命仍遵舊制  
十二月壬午禁諸王權勢之人增價鬻鹽壬辰定官民車  
服等第惟蒙古及怯薛諸色人不禁亦不許服龍鳳文甲  
午太陰犯輿鬼庚子浚揚州淮安運河復起李孟平章政  
事以齊履謙爲國子司業癸卯太陰犯房甲辰犯天江是  
歲地震冀寧汴梁及武安涉縣壞官民廬舍死者三百四  
十人發廩糶振如例

二年乙卯春正月乙卯歲星犯輿鬼己未太白晝見癸亥  
太陰犯軒轅丁卯犯進賢霖雨壞渾河堤沒民田發卒補  
之禁民鍊鐵乙亥遣使巡行天下分十二道問民疾苦黜  
陟官吏二月己卯朔會試進士以中選舉人分二榜揭於  
省門之左右戊子太白晝見癸巳太白經天庚子洞蠻吳



于道寇辰沅丙午太白經天三月乙卯廷試進士蒙古色

目人爲右榜漢人南人爲左榜賜護都沓爾張起巖等五

十六人及第出身有差自是每三歲一試用趙孟頫元明善議貢試之法

凡蒙古山科舉出身者授從六品色目漢人遞降一級歲貢八人上四人充部令史下四人爲各路教授丙辰

太陰色赤如赭庚午加上皇太后尊號曰全德泰寧福慶

皇太后夏四月戊寅朔日食辛巳賜進士恩榮宴於翰林

院庚子太陰犯壘壁陳辛丑賜下第舉人年七十以上者

從七品流官致仕六十以上者爲府州教授餘竝山長學

正後勿爲例定諸王功臣分地以流官爲達魯花赤各位

所辟爲副達魯花赤乙巳立規運提點所及廣貯庫竝隸

壽福院五月戊申朔復立陝西行御史臺辛酉太陰犯天

江乙丑秦州成紀縣北山南移至夕河川明日再移平地

突出土阜高者二三丈陷沒民居遣官驗視振恤庚子太白晝見加宦者續元暉昭文館大學士乙亥日赤如赭六月甲申太白晝見太陰犯平道河決鄭州辛丑以濟寧益都旱減宿衛士芻粟癸卯太白犯東井丙午辰星犯輿鬼秋七月甲寅升陳州商水鎮爲南頓縣改只哈赤八刺哈孫總管府爲尙供府乙卯給阿速戶貧乏者農具於連怯烈地屯田八月丙戌贛州蔡五九作亂陷江州寧化縣以趙世延爲御史中丞命省臣自平章以下送之入臺庚子升遼陽之秦州爲秦寧路增國子生百員歲貢伴讀四員立積分法月試上等者爲一分中等準半分積至八分者充高等歲終試貢壬寅詔江浙行省印農桑輯要萬部頒降有司九月丁未張閭以括田逼死民人下吏部鞫問詔

免江浙江南河南白實田租二年減汴梁路虛增糧二十  
二萬石己酉太陰犯房辛酉太白犯左執法蔡五九眾潰  
伏誅冬十月丙子朔客星見太微垣丁丑封脫火赤爲威  
靈郡王以郭貫參知政事鐵木爾脫知樞密院事乙未授  
白雲宗主沈明仁榮祿大夫佩司空印加鐵木迭爾太師  
十一月丙午客星變爲彗犯紫微垣歷軫至壁十五宿明  
年二月庚寅乃滅辛未以星變赦天下甲戌封武宗子和  
世球爲周王即明宗出鎮雲南丞相合散等以星變乞罷帝  
曰此朕之愆豈卿等所致其復乃職苟政有過差勿憚於  
改凡可以安百姓者當悉言之庶上下交修天變可弭也  
是歲江南湖廣道奉使溫迪罕言廉訪司公田多取民租  
詔復舊制時公田爲民害而荆湖尤甚部內實無田隨民  
所輸租取之戶無大小皆出公田租雖遇水旱

本苑故  
以爲言

三年丙辰春三月辛亥加將作院使呂天麟大司徒改直  
沽爲海津鎮甲寅命蕭拜住護送和世琜之雲南置周王  
常侍府官屬壬申禁各省春時畋獵夏四月癸酉朔立殊  
祥院升印經提舉司爲廣福監敕衛輝昌平守臣修殷比  
干唐狄仁傑祠庚子以買閩憨刺合爾竝知樞密院事趙  
孟頫爲翰林學士承旨五月庚申以伯鐵木爾蕭拜住同  
平章政事阿卜轉右丞郭貫爲左丞不花乞塔竝參知政  
事庚午置遼陽金銀鐵冶提舉司六月乙亥封孟軻父爲  
邾國公母爲邾國宣獻夫人丙子融賓柳州徭蠻叛丁丑  
敕大辟臨刑敢有橫加剗割者以重罪論凡鞫囚非強盜  
毋加酷刑河決汴梁秋七月乙卯封玉龍鐵木爾保恩王

丙寅以燕鐵木爾知樞密院事郭貫爲集賢大學士王毅

爲中書左丞置織佛像工匠提調所九月庚戌升縉山縣

爲龍慶州

以帝生是縣故改

癸丑太白晝見己未冀寧晉寧路地

震丙寅太白經天冬十月辛未復以高昉參知政事壬申

調四川雲南軍五千人於烏蒙屯田壬午河南路地震甲

申太白犯斗庚寅敕五臺靈鷲寺置鐵冶提舉司丁酉禁

民有父在者不得私貸人錢十一月壬寅遣御史監治嶺

北省鈎校錢糧半年更代乙卯改澧州路爲安定軍民府

周王和世球行至延安其臣脫忽魯及武宗舊臣教化等

謀結陝西丞相阿思罕發關中兵將分道入犯平章塔察

爾襲殺阿思罕教化等事敗初世球逃居漠北十二月丁

亥立皇子碩德八剌爲皇太子兼中書令樞密院使以牀

兀爾知樞密院事是歲集禧院使塔失不花集前代嘉言  
善行名承華事略并繪幽風圖以進帝命置東宮俾皇太  
子觀省

四年丁巳春正月詔大赦天下庚子帝謂省臣曰中書比  
奏百姓乏食宜加振恤朕思民饑若此豈政有過差以致  
然與曷詔百司務遵世祖成憲爾等宜勉力奉行輔朕不  
逮務期省刑薄賦庶使百姓可遂其生乙卯諸王脫脫駐  
雲南擾害軍民以按灰代之壬戌冀寧路地震閏月丙戌  
以立皇太子詔天下辛卯封別鐵木爾爲汾陽王諸土孛  
羅爲冀王加太常禮儀院使拜住大司徒特授近侍完者  
不花翰林侍讀學士同修國史三月丁卯朔升淨州爲路  
乙酉太陰犯箕夏四月不雨時帝在御久猶居東宮嘗夜

坐謂侍臣曰雨暘不時柰何蕭拜任曰宰相之過也帝曰卿不在中書邪拜任惶謝頃之帝露香默禱於天夜分大雨左右以雨衣進帝曰朕爲民祈雨何避爲戊申荅合孫寇邊吳王多列納敗之於和懷乙丑翰林學士劉賡進所譯大學衍義帝曰是書議論甚嘉令頒賜朝臣帝通達儒術兼悟釋典嘗曰明心見性佛教爲深修身治國儒道爲切又曰儒者可尙以能維持三綱五常之道也五月戊寅改太子衛率府爲中翊府壬午黃州眞州建寧等處流民羣聚剽掠救傷人及盜者如律餘竝給糧遣歸己丑以赤因阿卜竝平章政事乞塔爲右丞高昉爲左丞換任王桂竝參知政事六月乙巳太陰犯心內外監察御史其劾右丞相鐵木迭爾姦貪不法詔免官以合散爲右丞相己酉

以烏伯都刺王毅復平章政事丙寅定諸王駙馬功臣分  
地仍舊得自辟達魯花赤秋七月乙亥中書平章李孟罷  
己丑成紀縣山崩土石潰徙壞田廬辛卯冀寧地震帝諭  
省臣曰比聞蒙古諸部困乏往往鬻子女於人爲婢僕其  
命有司贖之還各部立宗仁衛總之帝出見衛士有敝衣  
者駐馬問之對曰戍守邊陲十五年以故貧耳帝曰此輩  
久勞於外畱守官未嘗以聞非朕親見何由而知自今有  
類此者必言於朕命賜之錢帛八月丙申熒惑犯輿鬼壬  
子太陰犯昴庚申合散奏事畢帝問曰卿等日所行者何  
事對曰第奉行詔旨而已帝曰卿等何嘗奉行朕旨雖祖  
宗遺訓朝廷法令皆不遵守夫法者所以辨上下定民志  
自古未有法不立而天下治者使人君制法宰相能守法



則民知所畏避紀綱可正風俗可厚其或法弛民慢怨言  
竝興欲求治安豈可得哉合散遂言故事丞相必用蒙古  
勳族臣本西域人不厭人望敢辭帝命宣徽使伯答沙爲  
右丞相合散仍左丞相九月庚午太陰犯斗嶺北地震三  
日大都南城產嘉禾一莖十二穗冬十月甲午朔遣王桂  
致祭陝西嶽瀆振秦州被災民戊午海外婆羅公民船漂  
至溫州敕江浙省資遣還國十一月己卯省汧源縣入隴  
州壬辰諭諸宿衛入直各班班次非有旨不得上殿闌入  
禁中者坐罪輟耕錄云有雲都赤乃宿衛之至親近者分  
三日一次入直帶刀立墀下以防姦回雖幸大臣許從二人他官一人門者譏其出入

輔奏事無雲都赤在不

敢進

十二月丁酉復置廣州采珠都提舉司

輟耕錄云廣東采珠之人懸絙於腰

沈入海中良久得珠撼其絙船上人挈出之葬於蛟龍之

腹者不少有司名曰烏蚤戶仁宗登極特旨放免至是復

行乙巳遣官卽興和路及淨州發廩振北方流民壬子以圖滿迭爾知樞密院事是歲復置詹事院及家令府延慶司典寶監改怯憐口總管府爲繕用司衛王阿木哥以罪貶高麗

五年戊午春正月甲戌懿州地震乙酉敕諸王位下民在大都者與平民均役丁亥以買住爲大司農爵魯國公二月癸巳朔日食和寧路地震封諸王圖滿鐵木爾爲武平王丁未建鹿頂殿於文德殿後甲寅置寧昌府敕上都諸寺商貨並輸稅三月戊辰改靜安路爲德寧路縣爲德寧縣敕書金字藏經共糜金三千九百兩夏四月庚戌免懷孟河南南陽民所輸陝西鹽課時解州鹽池爲水壞命懷地遠改食滄鹽而重轉海漕糧十萬石於遼陽以振貧民

甲寅以千盧

史作奴今從志

史弼竝平章政事敬儼參知政事五

月辛酉朔以亦列赤爲中書右丞遣王毅榮星於司天臺

三晝夜壬申御史言比年名爵冒濫太尉司徒國公接迹

於朝禮部鑄三公印二十有六此輩無功家國乞賜裁罷

詔以門閥勳業素著者存留一二餘竝革去己卯德慶路

地震六月辛卯從御史臺言罷張閻等經理民田虛增糧

數止如舊輸稅癸巳加典瑞院使幹赤集賢大學士大司

徒秋七月己未朔諸王不里身敦之叛諸王耶舍失列吉

及衛士朵帶伯都坐持兩端詔流耶舍江西失列吉湖廣

朵帶衡州伯都潭州戊子省翁源縣入曲江加封楚三閩

大夫屈原忠節清烈公九月癸亥大司農買住進司農丞

苗好謙所撰栽桑圖說帝曰農桑衣食之本此圖甚善命

刊刻散之民間

松雪齋集云上御嘉禧殿覽所進農桑圖問作詩者何人對曰翰林承旨趙孟頫作

圖者何人對曰諸色人匠提舉楊丁卯以亦列赤平章政

叔謙上嘉賞久之人賜文綺二段事高昉爲右丞換住爲左丞燕只干參知政事壬午敕軍

官犯罪聽樞密院議擬行省毋擅決遣丁亥復立行宣政

院於杭州置大永福寺都總管府改中翊府爲羽林親軍

都指揮司統軍萬人隸東宮冬十一月壬戌增置大都南

北兩兵馬指揮使色目漢人各二員丁卯追奪建康富民

王訓等白身濫受宣敕丙子詔唐陸淳著春秋纂例辨疑

微旨三書有益後學令江西行省錢梓以廣其傳癸未定

江西茶課以二十五萬錠爲額建殿於大永福寺奉安順

宗御容十二月壬辰特授集賢大學士脫列大司徒辛亥

置重慶路江津巴縣屯田省成都歲漕米萬二千石是歲

秦州秦安縣鞏昌隴西寧遠二縣皆山崩

六年己未春正月丁卯定邊遠軍官致仕還家者許給驛如民官例戊寅太陰犯心己卯廣東南恩州徭賊龍郎庚等爲寇帝御嘉禧殿謂太宗正買閩曰人命所繫至重其詳閱獄辭事無大小必謀諸同僚疑不能決者與省臺官集議然後以聞又顧謂侍臣曰卿等以朕居位爲安耶朕惟太祖勗業艱難世祖混一疆宇兢業守成恆懼不能當天心繩祖武使萬方樂得其所朕念慮在茲卿等固不知也二月丁亥朔日食改釋奠於中丁祀社稷於中戊釋奠成樂令各路府選習古樂師教肄生徒不得仍用俳優歌曲丁酉雲南閩里愛俄永昌蒲蠻阿八刺等竝爲寇戊戌改陝西轉運鹽司爲河東陝西都轉運司直隸省部己亥太陰犯靈臺二月辛酉命圖

士合爲御史大夫帝曰此任至重以卿勳舊之裔故特授

汝當思乃祖乃父忠勤王室仍以古名臣爲法否則將墜

汝家聲矣己巳太陰犯明堂敕諸王駙馬宗姻諸事依舊

制領於內八府官勿徑移文中書機耕錄云內八府宰相

宣命特中書照會之任而已寄位於翰林之掃鄰掃鄰宮

門外院官會集處也所職視草制若詔敕之文則非其掌

院之公事亦不得與例癸酉太陰犯日星甲戌犯心改懷

以國戚勳貴子弟充之孟路爲懷慶封諸王月魯鐵木爾爲恩王夏四月壬辰定

土官病故子姪兄弟皆準承襲無則從本俗許以妻承夫

職丙申令京官各運糧輸上都振蒙古饑民庚子復起鐵

木迭爾爲太子太師御史中丞趙世延論其不法數十事

帝以太后故不聽左遷世延爲四川行省平章五月辛酉

太陰犯靈臺丁卯犯房丙子犯壘壁陳六月戊子改繕珍

司爲徽儀司升莊浪巡檢司爲縣己亥歲星犯東咸辛丑  
置河南田賦總管府隸內史府戊申置勇敢署以角觝者  
隸之秋七月壬戌太陰犯心來安土官岑世興叛據唐興  
州降詔招諭之甲戌皇姊太長公主祥哥刺吉作佛事釋  
全寧府重囚二十七人帝怒命按問全寧守臣阿從不法  
仍追所釋囚還獄給朔方蒙古民駝馬牛羊俾牧養蕃息  
以自贍丙子太白犯太微垣右執法八月甲申以欽察張  
思明竝參知政事乙酉熒惑犯輿鬼閏月丙辰星犯太  
微垣右執法癸亥熒惑犯軒轅甲子太陰犯壘壁陳乙亥  
太白犯東咸九月戊戌省永興縣入奉聖州置雲南縣隸  
雲內州以故昌州寶山縣置寶昌州隸興和路敕諸司有  
受命不之官及避繁劇託故去職者奪其宣敕癸卯浚鎮

江練湖冬十月乙卯白雲宗總攝沈明仁強奪民田二萬頃誑誘愚俗十萬人帝稔知其奸下所司嚴鞠辛酉以鐵木爾不花爲御史大夫癸亥熒惑犯太微垣左執法乙丑太陰犯昴戊辰犯東井庚午太白晝見辛未太陰犯軒轅十一月辛卯熒惑犯進賢庚子禁民匿蒙古軍亡奴帝諭臺臣曰有國者以民爲本比聞百姓疾苦銜冤者眾其令監察御史廉訪使審察以聞十二月壬戌命皇太子參決國政追封宋儒周惇頤爲道國公封蕪瑗爲內黃侯從祀孔子丙寅太陰犯軒轅壬申犯心以虞集爲翰林待制帝謂左右曰凡在儒臣悉皆優用特虞伯生未顯擢耳癸酉夜風雪甚寒帝謂侍臣曰朕與卿等居暖室宗戚昆弟遠戍邊陲曷勝其苦歲賜財帛可不徧及耶敕上都大都冬夏設食於路



以食饑者是歲伏羌縣山崩揚州火燬官民廨舍二萬三千三百餘區

七年庚申春正月辛巳朔日食帝齋居損膳輟朝賀辛卯白雲宗沈明仁擅度僧四千八百餘人獲鈔四萬餘錠既辭伏復遣其徒沈崇勝潛赴京師行賄事覺詔逮赴江浙竝治其罪乙未太陰犯明堂上星己亥帝不豫辛丑崩於光天宮壽三十六癸卯葬起輦谷五月乙未加上尊諡曰聖文欽孝皇帝廟號仁宗蒙古語曰普顏篤皇帝八月丙辰耐於太廟

論曰武仁受授之際無可議者仁宗初政首革尙書省敝政在位九年仁心仁聞恭儉慈厚有漢文帝之風惟武宗初約由帝傳位己子和世球而後及於英宗及武宗崩仁

宗立乃出封和世琜於雲南而立子碩德八剌爲太子雖迫於皇太后之命而已不守初約矣和世琜不之雲南而舉兵赴漠北又不予以總兵和林之任於是英宗被弑而泰定以晉王入紹大統武宗舊臣燕鐵木爾不服遂於秦定殂後迎立周王於漠北迎立懷王於江陵懷王先立周王後至豈肯讓於兄於是弑之中途而國亂者數世使當初卽立周王何至於此至鐵木迭爾奸貪不法已經言官列款彈劾而猶礙於皇太后不敢質問遂貽英宗以奸黨謀逆之禍不得謂非仁宗貽謀不臧有以致之也

元史卷九終

英宗

英宗皇帝諱

吉刺氏以大德七年二月甲子生武宗卽位立仁宗爲皇太子約以次傳己子和世琜武宗崩仁宗立延祐初議立太子丞相鐵木迭爾請立帝帝入謁太后固辭曰臣幼無能且有兄和世琜在宜立太后不許遂立爲皇太子百司庶務令先啟後聞帝謂省臣曰至尊委我以天下事日夜寅畏惟恐不堪卿等當洗心滌慮恪勤乃職勿有墮壞以貽君父憂七年春正月戊戌仁宗不豫帝憂形於色夜則焚香泣曰至尊以仁慈御天下庶績順成四海清晏今天降大厲不如罰殛我身使至尊永爲民主辛丑仁宗崩帝

哀毀過禮素服寢地上日歎一粥癸卯太陰犯井甲辰鐵木迭爾以太后命拜右丞相二月壬子罷造永福寺召江浙左丞相黑盧平章中書省事戊午祭社稷每歲二仲月仍以上戊舉祭辛酉太陰犯軒轅御女壬戌犯靈臺甲子從鐵木迭爾言逮四川平章趙世延赴京中書參議乞失監坐驚官罪當杖太后欲笞之帝曰法者天下之公徇私而輕重之不可以示天下卒正其罪丙寅以趙世榮爲中書平章政事木八刺爲右丞張思明爲左丞丁卯太陰犯日星白雲宗總攝沈明仁以不法正罪籍江南冒白雲僧者爲民定京城環衛更番法準五衛漢軍歲例庚午太陰犯斗癸酉括崇祥院地冒以官地獻者追其直民地獻者歸其主丁丑鐵木迭爾奪前平章李孟所受秦國公制命

仆其先墓碑又矯太后旨殺前御史中丞楊朵爾只平章蕭拜住竝籍其家戊寅徽政院使失烈門傳太后命請更朝官帝曰此豈除官時邪且先帝舊臣不宐輕改俟予卽位後議於宗親元老賢者任之邪者黜之可也司農卿完者不花請奪先帝所賜諸臣土田帝問賜者爲誰對曰左丞相合散所得爲多帝曰予嘗諭卿等當以公心輔弼卿在先朝嘗請海舶之稅以合散奏而止今所言乃復私憾非公議也豈輔弼之道邪遂出之爲湖南宣慰使癸未奪西僧所授司徒國公制竝銷其印三月戊子太陰犯酒旗上星熒惑犯進賢徵諸王駙馬流竄者各還分邑庚寅帝卽位詔曰洪惟太祖皇帝膺期撫運肇開帝業世祖皇帝神機睿略統一四海以聖繼聖迨我先皇至仁厚德涵濡

羣生君臨萬國十年於茲以社稷之遠圖定天下之大本  
協謀宗親授子冊寶方春宮之與政遽昭考之賓天諸王  
貴戚元勳傾輔咸謂朕宜體先帝付託之重膺皇太后擁  
護之慈既深繫於人心詎可虛於神器合辭勸進誠意交  
孚乃於三月日卽皇帝位於大明殿詔免被災州郡縣銀  
五分江淮夏稅三分差發稅糧逋欠在民者普與蠲免各  
處站赤毋得泛濫給驛陳亡官軍常例存恤外再展一年  
兩廣雲南嘯聚徒眾許赴官自首概從寬宥其科舉貢試  
法竝如舊制尊太后爲太皇太后是夜太陰犯明堂壬辰  
敕羣臣超授散官者朝會毋越班次乙未日有暈若連環  
幹羅思內附賜鈔萬貫戊戌罷醫卜工匠任子定吏員秩  
止從七品如前制辛丑詔樞密院兼領左右衛率府左遷

李孟爲集賢侍講學士夏四月命造至元鈔五千萬貫中  
統鈔二百五十萬貫詔曰朕惟食貨生民之本權以泉幣  
貴在適時昔我世祖皇帝所立中統鈔廢罷雖久民間物  
價每以爲準有司依舊印造與至元鈔子母並行凡官司  
出納百姓交易並計中統鈔數前尙書省所發新舊銅錢  
與民間宿藏者所在充溢雖畸零使用亦便於民然壅害  
鈔法深妨國計其至大銅錢詔書到日立赴各行用鈔庫  
依例倒換無致虧損歷代舊錢有司所發者與百姓宿藏  
既不可辨令截日住罷至權禁金銀本以權衡鈔法條令  
雖設其價益增民實弗便自今權宜開禁聽從買賣若商  
舶私帶下番者依例科斷庚戌罷行通政院及少府監回  
回國子學省崇祥院入民匠總管府隸將作院甲寅太白



犯填星己未祭遁甲神於香山遣平章王毅右丞高昉徵  
理在京錢粟虧耗者七十八萬石及諸路歲貢幣稍紕繆  
者俱責償所司庚申降百官越階者竝依所授之職以拜  
住平章政事壬戌太陰犯房乙丑仁宗喪卒哭作佛事七  
日封王煦爲雞林郡公戊辰議仁宗祔廟以太廟七室皆  
有神主增室不及權結綵爲幄殿於太室東南安奉神主  
己巳罷市舶司禁賈人下番賈易增兩淮荆湖江南東西  
道田賦斗加二升回回散居郡縣者歲輸包銀二兩戊寅  
有獻七寶帶者因近臣以進帝曰朕初登大位不聞汝等  
進賢而爲人進帶是以利誘也其還之五月己卯復置稱  
海五條河屯田權廣東番貨庚辰上都畱守賀勝賜名賀伯顏  
坐便服迎詔棄市己丑敕中書省有內降旨除拜濫賜名

爵者聽覆奏乃行左遷左丞相合散爲嶺北平章命拜住爲左丞相塔失海身平章政事只爾哈郎參知政事庚寅太陰犯心壬辰和林民閭海瘞殍死者三千餘人詔旌其門癸巳太陰犯天狗乙未加上大行皇帝尊諡曰聖文欽孝皇帝廟號仁宗丙申太白犯畢有告前丞相合散平章黑盧御史大夫脫忒哈徹政使失烈門等與故要束木妻亦烈失八其謀廢立者拜住請鞠狀帝曰彼若借太皇太后爲辭柰何竟不問悉誅之籍其家辛丑以鐵木爾脫平章政事壬寅罷僧道工伶濫爵及建寺豢獸費六月甲寅省徹政院及宮正章慶延福三司停廣東采珠丁巳以康里脫脫爲御史大夫欽察鐵木爾不花竝知樞密院事庚申太陰犯斗賜角觝者百二十人鈔各千貫女巫伯牙台

鈔萬貫壬戌敕諸使至京者大事五日小事三日速遣還  
是夜月食既癸亥太陰犯壘壁陳乙丑新作太祖幄殿修  
寧夏欽察魯佛事給鈔二百一十二萬貫丁卯太白犯井  
辛未太陰犯昴丁丑改紅城中都威衛爲忠翊侍衛親軍  
都指揮司復徽儀司爲繕珍司秋七月壬午立普定路屯  
田運和寧糧於札昆倉以便邊軍甲申車駕將幸上都調  
左右翼軍赴北邊浚井丁亥太陰犯斗丙申初製袞冕戊  
戌熒惑犯房敕中外希賞自請者勿予己亥太陰犯昴庚  
子以廉恂平章政事癸卯賜伶人鈔二萬五千貫酒人鈔  
十五萬貫回回大醫進藥曰打里身給鈔萬貫八月丁未  
朔嶺北省臣忻都以官錢犒軍坐免詔復其職丙辰附仁  
宗皇帝莊懿慈聖皇后於太廟

仁宗皇后本傳作至治二年崩祔廟又有英宗卽位

尊爲皇太后之文而本紀載此未知孰是太白犯靈臺乙丑熒惑犯天江丁卯

太白犯太微垣右執法鐵木迭爾以私憾請殺趙世延不許帝幸涼亭謂近侍曰朕素聞世延忠良故每奏不納左右咸稱萬歲宮人官奴坐妄用日者請太皇太后禳星杖之壬申太陰犯軒轅御女九月甲申建壽安山佛寺給鈔十萬貫命拜住董其役禁五臺山采樵乙酉太陰犯壘壁陳丙戌熒惑犯斗壬辰吐蕃利族阿俄等五種寇成谷溪蠻秦元吉寇循州癸巳太陰犯昴戊戌犯鬼己亥太白犯亢以廩藏不充停諸王所部歲給甲辰雲南木邦路土官給邦西陽土官冉世昌各遣子入貢遣使占城真臘龍牙門索馴象冬十月庚戌太陰犯熒惑于斗辛亥犯井酉陽聳儂洞蠻田謀遠爲寇戊午帝諭太常禮儀院曰朕將以

四時躬祀太室宜與羣臣集議典禮此追遠報本之道毋以朕勞於對越而有所損其悉遵古禮以行癸亥太陰犯井丁卯爲皇后作鹿頂殿於上都癸酉流諸王阿剌鐵木爾於雲南十一月丙子朔帝御齋宮丁丑恭謝太廟至仁宗室欷歔流涕左右感動庚辰省永平之灤邑縣入石城禁京城諸寺邸舍匿商稅辛巳以親享太廟禮成受朝賀甲申敕修仁宗實錄及后妃功臣傳戊戌交趾蠻儂志德寇脫零那乞等六洞癸卯熒惑犯壘壁陳甲辰計京官俸鈔給米三分遣使閱實各省戍兵十二月乙巳朔以改元赦天下詔曰朕祇遙貽謀獲承丕緒念付託之惟重願繼述之敢忘爰以延祐七年十一月二日被服袞冕恭謝於太廟既大禮之告成宜普天之均慶屬茲踰歲用易紀元

於以導天地之至和法春秋之謹始可以明年爲至治元年減天下租賦二分包銀五分大都上都興和三路差稅全免三年優復煮鹽煉鐵運糧等戶二年開燕南山東河泊禁聽民采取命官家屬流落邊遠者有司資給遣歸其子女典鬻於人者聽還其家監察御史廉訪使歲舉可任守令者二人七品以上官有偉畫長策可濟世安民者實封來上士有隱居行義不求聞達者有司具名以聞丁未播州蠻蠻的羊籠等來降癸丑以天壽節預修醮於龍虎山乙卯加上儀天興聖慈仁昭懿壽元全德泰寧福慶太皇太后尊號曰徽文崇祐太皇太后是夜太陰掩昴翰林學士譯進大學衍義帝曰修身治國無踰此書命刊本頒賜羣臣河南饑帝問其故羣臣皆莫對帝曰良由朕治道

未洽卿等又不盡職委任非人致陰陽失和災害薦至宜各務勤恪以應天心戊午太陰犯井庚申犯鬼乙丑祭星

於回回司天監四十晝夜丙寅以闕徹伯知樞密院事丁

卯敕上書言事者得直達御前勿令省臣開視如細民訴

訟仍加禁止己巳敕罷明年二月八日迎佛初世祖用帝

於御座上置白繖蓋一頂用泥金書梵字其上歲以二月

殿建白繖蓋好事周遊皇城內外云與眾生祓除不祥累

朝相沿爲定制至是偶罷以只爾哈郎爲中書右丞薛處敬參知政事

辛未拜住進鹵簿圖帝以唐制用萬二千三百人太多乃

定大駕三千二百人法駕二千五百人丹墀獨對云至大

簿圖并書武宗賜官大樂署丞延祐中又進中道外仗圖

英宗親祀太室命丞相拜住取祕書所藏異初圖書而鹵

簿大興太室改稱太廟凡川蜀江南大木悉致焉旗幟之

繡繪者作於閩浙人馬鎧甲被彩飾者作於江西又詔留

守造五輅癸酉帝聞賀勝母老憫之以所籍京兆田磴還其家

是歲河決汴梁原武滹沱決文安大成等縣渾河溢壞民  
田廬成紀縣暴雨山崩朽壤墳起覆沒畜產益津縣雨黑  
霜害稼各蠲振有差帝以科舉之外恐有遺賢詔曰比歲  
設立科舉以取人材尙慮高尚之士晦迹丘園無從可致  
其有才德超邁深明治道者所在官司具姓名俟廉訪使  
覆察奏聞以備錄用

至治元年辛酉春正月丙戌定四孟月時享太廟帝服袞  
冕親祭以左丞相拜住亞獻知樞密院事闊徹伯終獻禮  
成坐次謂羣臣曰一歲惟四祀若使人代不能致如在之  
誠實所未安歲必親祀以終朕身

通攷云禮社稷亦如之

羣臣以祀

事畢請赦帝曰恩可常施赦不可屢下使殺人獲免則死  
者何辜命中書省陳便宜事行之丁亥帝欲以元夕張鐙



禁中參議省事張養浩上書諫遽命罷之曰有臣若此朕復何憂自今朕凡有過豈獨臺臣當言人皆得言賜養浩金帛乙未太陰掩房甲辰星犯外屏木金火土四星聚奎二月己酉作仁宗神御殿於普慶寺遣近臣卽趙孟頫家俾書孝經壬子夜金火土三星復聚奎丁巳監察御史觀音保鎖咬爾哈的迷失成珪李謙亨諫造壽安山佛寺帝怒殺觀音保鎖咬爾杖珪謙亨竄之奴兒干地辛酉太白犯熒惑癸亥太陰犯心甲子置承徽寺割宐興民四萬戶隸之丁卯禁越省臺訴事三月丁丑太陰掩昴辛巳賜西番撒思加地僧金銀數千兩袈裟二萬襲遣呪師朵爾只往牙濟班卜二國取佛經癸未製御服珠袈裟寶集寺金書西番波若經成置大內香殿己丑大同路麒麟生辛

丑以鐵失爲御史大夫

鐵木迭爾義子也

領忠翊侍衛親軍都指

揮使夏四月戊午太陰犯心庚申犯斗造象駕金脊殿戊

辰命宦者李羅台爲太常署令太常官言刑人難與大祭

遂止五月戊寅太白犯鬼積尸氣太陰犯軒轅庚辰犯明

堂毀上都回回寺壬午從鐵木迭爾言遷武宗子圖帖睦

爾於瓊州

卽文宗

禁日者毋交通諸王駙馬掌陰陽五科者

毋泄占候辛卯作行殿於縉山流杯池乙未命世家子弟

成童者入國學辛丑太常禮儀院進太廟制圖六月癸卯

朔日食作金浮屠於上都藏佛舍利己未太陰犯虛梁辛

酉太白經天趙宏祚等以言事勒歸禁妄言時政乙丑遣

使往銓江浙江西湖廣四川雲南五省邊郡官選己巳以

只爾哈郎平章政事秋七月辛巳蓋屋僧圓明邵陽道士

劉志先以妖術作亂遣樞密判官章台督兵捕誅之禁僧  
道度牒符籙癸巳太陰犯昴己亥奉仁宗及帝御容於大  
聖壽萬安寺八月丁未太陰犯心己酉犯斗壬子熒惑犯  
軒轅壬戌車駕自上都還駐蹕興和左右以寒甚請早還  
帝曰兵以牛馬爲先民以稼穡爲本朕遲留不行者蓋欲  
馬得芻牧民得刈穫一舉兩得何計乎寒敕翰林集賢官  
年七十者毋致仕九月乙亥熒惑犯靈臺壬午犯太微西  
垣上將丁酉犯右執法冬十月丙午太白經天戊申熒惑  
犯太微垣左執法癸丑以內郡水罷不急工役敕蒙古子  
女鬻爲回回漢人奴者官爲收養禁中書掾曹毋泄機事  
己巳遣燕鐵木爾巡邊十一月辛未熒惑犯進賢乙亥幸  
大護國仁王寺丙子太陰犯虛梁戊寅羣臣上尊號曰繼

天體道敬文仁武大昭孝皇帝是夜辰星犯房辛巳命鐵  
失領左右阿速衛軍丙戌太陰犯井己丑犯酒旗又犯軒  
轅辛卯犯明堂癸巳以營田司徵酒稅擾民命有司兼榷  
己亥太白犯西咸十二月辛丑立皇后亦乞列氏遣右丞  
相鐵木迭爾持節授玉冊玉寶甲辰熒惑犯亢戊申帝以  
受尊號躬謝太廟行一獻禮賜與祭者帛普減內外官吏  
一資庚戌太陰犯昴己未幸西僧灌頂寺封峻南藏卜爲  
白蘭王辛酉熒惑入氏甲子命帝師詣西番受具足戒賜  
金千兩銀四千兩幣鈔各鉅萬乙丑冶銅五十萬斤作壽  
安山寺佛像置中瑞司領之是歲河南安豐江州水振粟  
九萬八千石鈔二萬五千貫霸州渾河溢被災民二萬三  
千三百石雷州海溢壞民田四千餘頃各免其租稅

二年壬戌春正月甲戌禁漢人持兵器出獵及習武藝丁丑帝親享太廟始陳鹵簿賜導駕耆老帛是夜太陰犯昴戊寅敕有司存卹孔氏子孫庚辰太白犯建星辛巳敕臺憲用人勿拘資格癸未建行殿於柳林封塔察爾爲蘭國公辛卯太陰犯心甲子熒惑犯房丁酉太白犯牛二月己亥朔熒惑犯鍵閉星

通攷云日食

庚子罷上都歇山殿工辛丑

以欽察買盧竝爲中書平章政事王居仁參知政事丙午熒惑犯罰星戊申太陰犯井庚戌熒惑犯東咸辛亥太陰犯酒旗及軒轅壬子太白犯壘壁陳癸丑太陰犯明堂新作流杯池行殿敕嘉湖二路攷究太湖入海故道疏濬之乙亥西僧亦思刺蠻展音有疾釋罪囚己未太陰犯天江壬戌太白犯壘壁陳廣海郡邑曠官敕願仕者升秩二等

三月己巳令廉恂張養浩字朮魯狝理國學外郡學校命御史臺翰林院國子監同議興舉敕四宿衛興聖宮及諸王部勿用南人辛未禁捕鴛鴦違者籍其家放京師營繕役卒四萬餘人丁亥復置市舶司於泉州慶元廣東三路禁子女金銀絲帛下番己丑有暈貫日如連環給宗仁衛蒙古子女衣糧丁酉駙馬許納之子速怯訴父謀叛母私從人帝曰人子事親有隱無犯今有過不諫乃復告訐命速誅之夏五月己巳修滹沱河堤丙子熒惑退犯東咸庚辰置營於永平收養蒙古子女四方藏匿者加罪甲申以只爾哈郎爲御史大夫置宗仁蒙古侍衛親軍都指揮司以馬刺爲使戊子禁民間集眾祈神并白蓮佛事閏月戊戌封諸葛忠武侯爲威烈忠武顯靈仁濟王戊申以鐵木

元史卷十 本紀

十

送爾子班丹知樞密院事壬子作紫檀殿

王逢文集云至治間燕人史驪

兒舌琵琶家上受幸上使酒無敢諫者一日御紫檀殿飲驪兒歌殿前歡曲有酒神仙之句上怒叱左右殿之後悔

日驪以酒

六月丁卯朔駕幸五臺山戒衛士毋踐民禾壬

申熒惑犯心癸酉禁日者妄譚天象修渾河堤秋七月己

亥熒惑犯天江壬子遣親王閣閣圖總兵北邊封武寧王

戊午太陰犯井宿越星車駕次應州曲赦金城縣囚徒左

丞張思明坐罪杖免籍其家錄諸役軍匠病者千餘人各

賜鈔遣還八月甲戌次奉聖州詔畫蠶麥圖於鹿頂殿壁

帝曰以時觀之可知民事他日御鹿頂殿謂拜住曰朕以

幼沖嗣承大業玉食錦衣何求不得惟念祖宗櫛風沐雨

戡定萬方會有此樂耶卿元勳之裔當體朕懷毋忝爾祖

拜住謝曰勗業惟艱守成不易陛下思及此億兆之福也

庚寅鐵木迭爾死九月

通攷云朔日食

辛亥幸壽安山寺賜監役

官鈔人五千貫丙辰太皇太后崩己未太陰犯明堂庚申  
停今年冬祀南郊癸亥地震減膳徹樂近臣有進觴者帝  
曰朕方修德不暇汝反爲是諂邪斥出之因戒近臣曰汝  
等居官食祿當勉力圖報苟或貧乏朕不惜賜與若所爲  
非法則必刑無赦冬十月戊辰享太廟以國哀迎香去樂  
修廟工役未畢妨陳宮懸止用登歌丙子押濟思國遣使  
來貢南臺御史大夫托托請告未得旨輒去杖謫雲南庚  
辰太陰犯井建太祖神御殿於興教寺己丑熒惑犯壘壁  
陳命拜住爲右丞相罷左相弗置獨任以政十一月甲午  
朔日食以立右丞相詔天下詔流民復業者免差稅三年  
站戶貧乏鬻賣妻子者官爲贖還凡差役造作先科商賈



末技富實之家以優農力御史李端言近者京師地震日月薄蝕皆臣下失職所致帝曰是朕思慮不及致然自當修飾以謹天戒癸卯地震甲辰太白犯壘壁陳罷徽政院乙巳熒惑犯壘壁陳戊申太陰掩井從御史李端言命臣下所奏事目及上之言動悉書起居注付史館己未太陰犯東咸庚申犯天江辛酉熒惑犯歲星宣德府地震震改八番軍民長官司二十有八爲州縣十二月乙丑太白歲星熒惑聚於室太白犯壘壁陳丁卯復以張珪平章政事加司徒甲戌來安路總管岑世興葛蠻安撫使龍仁貴柔遠州洞蠻把者作亂命各行省分兵討之乙亥太陰掩井戊寅太白犯歲星庚辰以只爾哈郎知樞密院事速速爲中書左丞馬刺參知政事癸未以宗仁衛蒙古子女多至

萬人權停收養弛河南陝西酒禁禁近侍奏取沒入官錢  
丙戌省雲南西沙縣入鹽州己丑熒惑犯外屏太陰犯建  
星辛卯西僧灌頂疾請釋囚帝曰釋囚祈福豈爲私惜朕  
思惡人屢赦反害善良何福之有宣徽院請增尙食羊帝  
不許曰天下之民皆朕所有如有不足朕當濟之若額外  
多取百姓必致重困食亦何益其遵世祖舊制司徒劉夔  
同僉宣政院事囊加台坐妄獻地土冒取官錢伏誅鐵木  
迭爾子宣政使八刺吉思受夔冒獻田地御史大夫鐵失  
同受賂事聞帝曰法者祖宗所制非朕得私彼雖事朕久  
今既有罪當論如法卽令誅之惟鐵失獲免是歲六月敕  
修大元聖政典章成分類六十卷又得鄱陽馬端臨所著  
文獻通攷三百四十八卷皆鏤板以行

三年癸亥春正月癸巳朔暹國及八番洞長各來貢己亥  
敕行省平章政事仍賜金符兼總軍政軍官有罪重者以  
聞輕者就決壬寅罷上都雲州興和宣德蔚州奉聖州及  
雞鳴山房山黃蘆三义諸金銀冶聽民采鍊輸稅起吳元  
珪王約韓從益竝商議中書省事徵趙居信爲翰林學士  
承旨吳澄爲翰林直學士是夜太陰犯鉞星癸卯犯井甲  
辰遣諸王忽刺出鎮雲南壬子靜江邕柳諸郡獠爲寇泉  
州民畱應總作亂命各行省遣兵捕之征東末吉地兀者  
戶以貂鼠水獺海狗皮來獻詔存恤三歲丁巳定封贈官  
等秩初武宗至大二年制以封贈非世祖所行令罷之至是詔從新分立等第辛酉定內外官  
不次銓用者升職勿升階出趙世延於獄凡官民訴訟原  
告逃匿則釋待對者著爲令二月癸亥朔定軍官襲職嫡

長子孫幼者許令諸兄弟姪代攝是夜熒惑太白填星聚於胃丙寅仁宗實錄成遣使往西番徵畜牧治郵傳戊辰天壽節賓丹瓜哇二國來貢癸酉太白犯昴帝謂拜住曰近者地道失靈風雨不時豈朕行事有關與對曰地震自古有之陛下自責固宜良由臣等失職不能變理帝曰朕在位三載於兆姓萬物豈無乖戾之事卿宜與百官議有便民利物者朕即行之辛巳太陰犯東咸纂修大元通制成頒行天下一曰斷例二曰條格三曰詔赦四曰令類凡二千五百三十九條丙戌雨土新造五輅成戊子封鷹師不花爲趙國公辛卯以太子賓客伯都廉貧賜鈔十萬貫三月壬辰朔車駕幸上都西番參卜郎諸族叛敕鎮西武靖王搠思班發兵討之戊申祔太皇太后於順宗廟室丙

辰定醫卜匠官居喪不得去職年七十不聽致仕子孫無  
蔭敘能紹其業者量材錄用徵逸士瞻思至見於龍虎臺  
帝厚遇之以養親辭歸夏四月壬戌朔令天下諸司飯僧  
誦經十萬部甲戌命張珪王士熙勉勵國子監學都功德  
使闕爾魯至京師釋罪囚大辟者三十一人杖者六十九  
人放籠禽十萬令有司償其直己卯詔行助役法遣使攷  
視稅籍  
高下出田若干畝使應役之人更掌  
之收其歲入以助役費官不得預五月辛卯降開成路  
爲州增置安慶瀾山縣雲南寧遠州慶元嶧山縣設大理  
路白鹽城及中慶路榷稅官戊戌太白經天庚子大風雨  
雹拔柳林行宮木二千七百株辛丑命鐵失獨署御史大  
夫事癸卯太陰犯房戊申監察御史蓋繼元宋翼極言鐵  
木迭爾奸惡帝命毀所立碑仍追奪官爵沒其家貲帝御

大安閣見太祖世祖遺衣皆縑素木棉重加補綴嗟嘆良久謂侍臣曰祖宗勩業艱難服用節儉如此朕焉敢頃刻忘之是夜太白犯畢戊午奉元行宮正殿災上都利用監庫火帝曰世皇始建宮室垂數十年至朕而燬皆朕不德所致也有欽察衛戍卒累功當賞以官帝曰名爵豈賞人之具邪其賜鈔三千貫六月戊辰贈乳母忽禿台定襄郡夫人其夫阿來追封定襄王諡忠愍癸酉太廟新建前殿成以東西二間爲夾室壁以紅泥南向爲門命太常纂修累朝儀禮癸未填星犯畢乙酉諸王怯伯數寇邊至是遣使來降帝曰非欲彼土地人民但使吾民不罹邊患軍士免於勞役幸矣今旣來降當厚其賜以安之江浙行省言鎮江運河全籍練湖之水爲上源漕運商販舟楫無不由

此前朝常濬此湖蓄潦水若運河水淺開放練湖一寸可添河水一尺乞加修治以通遞運制可秋七月辛卯朔

減海道歲運糧二十萬石

以江南民力困極而京倉充滿故也

并免江淮增

科糧己酉封諸王忽都鐵木爾爲威遠王御史臺請降旨

開言路帝曰言路何嘗不開但卿等選人未當耳且中書

選人署事未旬日御史臺卽改除之臺除者中書亦然今

山林遺逸良多卿等不能盡心求訪惟以親戚故舊更相

汲引邪八月癸亥車駕自上都還駐蹕南坡御史大夫鐵

失知樞密院事耶先鐵木爾大司農失禿爾前中書平章

赤斤前雲南平章完者及鐵木迭爾子鎖南典瑞院使脫

火赤樞密副使阿散僉書樞密事章台衛士圖滿及諸王

按梯不花孛羅月魯不花曲律不花兀魯思不花等謀逆

以阿速衛兵爲外應弑帝於行幄殺右丞相拜住帝年二十一從葬諸帝陵泰定元年二月加上尊諡曰睿聖文孝皇帝廟號英宗蒙古語曰格堅皇帝五月祔於太廟

論曰舊史謂英宗果于誅戮奸黨畏懼遂構大變烏乎是何言與以鐵木迭爾之奸不明正其誅但疏遠俾得善終於位已爲漏網而復任用其子曲貸其子釀成梟鏡此失之果乎失之不果乎拜住於鐵木迭爾引其黨參政張思明自助時或告拜住爲備拜住反以大臣不和彼仇我報非國家之利及鐵木迭爾死又往哭之痛此皆失之果乎失之不果乎且除奸莫要於奪兵權乃以宿衛新兵掌於鐵失之手司徒劉夔冒賣浙田之案真人蔡道秦殺人賂追之案皆奸賊巨萬拜住既平反其獄而獨赦鐵失不問



元史卷十終  
中書參議諫以除奸不可猶豫猶豫恐生他變拜住是其  
言而不能以大抵安童拜住皆木華黎之孫木華黎用兵  
所過動輒屠戮安童從許衡受學故其子孫皆出於寬容  
以水懦救火猛德量有餘機警不足所謂君子之過過於  
厚也乃胡粹中因舊史之言謂英宗在位數載除誅戮外  
無一善政可紀甚至皇太后以嬖孽失勢之故鬱鬱而終  
胡氏并指爲英宗不孝祖母之罪烏乎其性與人殊乃至  
此乎